



# education

Department:  
Education  
REPUBLIC OF SOUTH AFRICA

**NATIONAL  
SENIOR CERTIFICATE**

**IGREYIDI-12**

**ISINDEBELE ILIMI LESIBILI LOKUNGEZELELA (SAL)**

**IPHEPHA LOKUTHOMA (P1)**

**NOVEMBA 2008**

**IMITLOMELO: 120**

**ISIKHATHI: ama-iri ama-2**

**Iphepheli linamakhasi ali-17.**



1. Iphepheli lineegaba ezine: Isigaba A, B, C no-D.  
ISIGABA A: Ukufunda Nokuzwisisa.  
ISIGABA B: Ukurhunyeza  
ISIGABA C: Ihlelo nokusetjenziswa kwelimi  
ISIGABA D: Zemitlolo
2. Phendula yoke imibuzo engaphasi kweengaba ezinikelweko.
3. Fundisisa yoke imibuzo ngaphambi kobana uyiphendule.
4. Iimpendulo azingahlangahlanganiswa.

**ISIGABA A: UKUFUNDA NOKUZWISISA****UMBUZO 1**

Phendula umbuzo 1.1 kanye nombuzo 1.2

1.1 Funda indatjana engenzasi bese uphendula imibuzo elandelako.

Ingabe ikghono lakho ngiliphi? Amandla wakho alele kuphi na? Ngikuphi okwaziko ongasiza umphakathi wekhenu ngakho? Ikghono lakho kumele likusize belikungenisele imali.

Isikhathi sanamhlanje sikhathi sokuzithukisa, sokuzakha, sokuzizamela kanye nesokuzenzela. Siphila kwaziboneleni. Ingani kuyatjihiwo bonyana kubamba ezumako. Lesi sikhathi samakghono. Funisisa bona lakho ikghono likuphi, nasele ulitholile, lisebenzise ngendlela efaneleko. Nawukghonako ungalithukisa ngokulibandula nokuthi ulakhe bewufunde unabe ngalo ikghono lakhwelo. Ungazitheli ngamanzi amakhaza, uthi wena unekghono kodwana ngakelinye ihlangothi kube ibubulo lakho alikhuli.

Sebenza ngendlela yokuthi boke abantu bafune ukwenzelwa nguwe izinto. Bafune ukusizwa nguwe ngombana uwazi umsebenzakho begodu unesisa. Likhuphe loke ikghono lakho nawenzela abantu izinto. Ukungatjheji akufuneki. Siphila ephasini lephaliswano. Nawungeze wenza umsebenzi obabazekako, abantu bazokutjihiya badlulele phambili kabanye abazimiselako. Wena nomndenakho nizakusala nilambile.

Nawulitjhejako ikghono lakho, uzokuphumelela bewugcine sewuyinjinga. Phela bavela njalo abosomabubulo abancani, bathoma kancani kancani bagcine sebaphakeme, bahlonitjhiwa ngebanga lomsebenzi wabo omuhle nosezingeni eliphezulu abawenza ngokuzimisela. Uzwe nabantu abatjha nabakhuluma ngabo bathi *mabhoza*. Kuliqiniso bonyana nawulibandule ngokwaneleko ikghono lakho, ungagcina sewuyinjinga begodu ubalwa esibalweni sabosomabubulo abaphumeleleko. Kade indoda esuthako beyibonakala ngokuba neenkomo ezinengi. Namhlanje iinkomezo azisekho kodwana yimali umuntu azibulungela yona ebhanga. Abantu abazokuphumelela ngilabo abanamakghono, ababandulwe kuhle nalabo abathi bangaba namakghono bawasebenzise ngendlela ekungiyiyo.

Amalanga la izandla ezibandulwe kuhle zingakungenisela imali ebonakalako. Abantu abanengi bacabanga bona ukufunda kukhuluma isikhuwa bewusikhuphe nangeempumulo. Lokho akungenisi imali. Ukatsu angalala eziko usazi njalo isikhuwa. Sihle sona isikhuwa, simnandi begodu siyakwazi ukukuthintanisa nabantu abanengi, abakhulu nabaziwako. Kodwana imali yona ilele ekubeni namakghono. Kade ukwenza umsebenzi wezandla bekuqalelwa phasi. Bewuthathwa njengomuntu ongakafundi nawenza umsebenzi wezandla. Namhlanje akusesenjalo, minengi imisebenzi yezandla ongayenza enjenga le elandelako: ukwakha izindlu, ukubaza, ukufaka igezi, ukufaka amaphayiphi wamanzi, ukulungisa iinkoloyi, ukutjhisela iinsimbi, ukwakha iinkhomphyutha, njalonjalo.



Lesi sikhathi sokuthi siye ngobunengi eenkolweni ezifundisa amakghono. Sifunde ngamakghono azokusiza ekuthuthukisweni kwenarha yekhethu. Naso-ke iselele esiqalene nayo thina. Zithuthukise! Kuvuswa ezivusako!

- 1.1.1 Tomula ikulumo ehlathulula bona kuphumelela umuntu osebenzako. (2)
- 1.1.2 Ngikuphi omele ukwenze nasele ulitholile ikghono lakho bona ngiliphi? Ipendulwakho ayiveze iphuzu ELILODWA. (2)
- 1.1.3 Ingabe kuqakathekile bona ikghono libandulwe? Vuma/Phikisa bese usekela ipendulwakho ngomutjho otonyulwe endatjaneni. (3)
- 1.1.4 Tlola okukodwa okungenza abantu bafune ukwenzelwa nguwe izinto nanyana bafune ukusizwa nguwe. Ipendulwakho ayibe MUMUTJHO. (2)
- 1.1.5 Umtloli wetheksti le akasithandi isikhuwa. Phendula ngo-IYE nanyana u-AWA bese usekela ngomutjho uveze iphuzu ELILODWA. (3)
- 1.1.6 Ngokubona kwakho, ingabe inarha yeSewula Afrika inabantu abanamakghono aneleko? Sekela ipendulwakho ngephuzu ELILODWA. (3)

1.2 Funda indatjana engenzasi bese uphendula imibuzo elandelako.

Sekuyinto ejayelekileko ukuhlukunyezwa kwabentwana. Lokhu kwenziwa mindeni, iinhlobo kanye nabanye abantu emphakathini.

Ukuhlukumezeka kungeendlela ezinengi. Abentwana bayahlukunyezwa ngokomzimba. Lokho kwenzeka ngokubethwa, ukulinyazwa kanye nokusetjenziswa imisebenzi engakabafaneli.

Abanye abentwana bahlukunyezwa ngokomseme. Uthola isihlobo nanyana umzali akata umntwanakhe athi angakhulumi umntwana loyo. Athuselwa ngokuthi nakangakhuluma uzokwemukwa okuthileko nanyana uzokubethwa. Abanye bathuselwa nangokubulawa. Umntwana uzokuhlalela evalweni, ahlale athukile. Umntwana onjalo uthuswa lilize, uyathuka nanyana kudlula ikoloyi nanyana kuphapha ipukani ngehla kwakhe. Omunye umntwana ubonakala ngokuhlala ayedwa angasakwazi ukudlala nabanye abantwana ngombana ingqondo yakhe ikhubazekile. Kanengi izenzo zokuthuselwa zenziwa babantu abatjhidelene khulu nomntwana loyo. Unembeza sewafa ebantwini abanengi neemilo azisekho. Abantu abanjalo kuthiwa sebefelwa bonembeza.

Abantwana bangahlukunyezwa ngokomkhumbulo kanye nemphefumulweni. Ababelethi abahlala basilwa njalo, ukusetjenziswa kwehlamba kuvamisile ukwenza umntwana nanyana abantwana bona bangathabi. Ezinye izinto zizenzo ezinelaka nezitjengisa ukulwa kanye nezomseme ezihlahlathisa umzimba abantwana abazibona kumabonakude. Izenzo ezinje zenza abantwana bakhule banelaka begodu bathande nokulwa. Izenzo ezinje zenza abantwana bonyana baphazamiseke eemfundweni zabo. Abanye abantwana baphelelwa yihlonipho, babaleke nemakhaya. Ngikho emadrobheni sinama-*street kids*.

- 1.2.1 Tlola amatshwayo amabili ongabona ngawo umntwana ohlukunyezwa. Ipendulwako ayibe mimitjho EMIBILI. (4)
- 1.2.2 Ngonjani umuntu ekuthiwa ufelwe ngunembeza? Ipendulwakho ayibe MUMUTJHO. (2)
- 1.2.3 Tlola imihlobo emibili nanyana iindlela EZIMBILI abantwana abahlukunyezwa ngazo. (2)
- 1.2.4 Ingabe izenzo zokuhlukunyezwa kwabantwana zibikwa zoke? Sekela ipendulwakho. (3)
- 1.2.5 Kunombono othi umabonwakude akakalungi ebantwaneni abasakhulako. Ingabe uyavumelana nombono lo? Sekela ipendulwakho uveze iphuzu ELILODWA. (3)
- 1.2.6 Tlola inomboro umntwana angayibethela nakafuna ukubika ukuhlukunyezwa. (1)

**IMITLOMELO YESIGABA A: 30**



**ISIGABA B: UKURHUNYEZA****UMBUZO 2**

Funda isiqetjhana esingenzasi bese uyasirhunyeza ngewakho amagama uveze amaphuzu amumongo naqakathekileko. Amagama ozowasebenzisa angeqi ema- 40 ukuya ema-50.

Nakade abantu bebavele babhubhe. Nanyana kunjalo, iinzathu zokubhubha komuntu zazibalwa, kwakukugula nanyana ukulinyazwa epini. Bekakhona namalwele agade aziwa bona ayabulala kodwana bekambalwa khulu begodu abulala ngokweminyaka yomuntu. Ukwenza nje isibonelo, umntwana bekabhubha asesemncani. Bekungenzeki kobana athi sele akhulile kuthiwe ubhubhile. Lokho bekwenziwa kukobana umzimbakhe bewaqina ungabe usangenwa malwedlana walokha nakasesemncani

Ngaphandle komntwana obegade abulawa malwele wabantwana, kwakukhamba abantu abadala. Nabo abantu abadala bebakhamba ngamalwele aziwako najayelekileko. Lawo bekakhambelana nokukhula komuntu. Lokho kutjho bona eminyakeni yokukhula ephakathi, umuntu bekangabhubhi. Nakwenzekileko bona abhubhe bekuba sizathu esitjengisa ukubulalana ngeendlela zangabomu, njengokuloywa.

Zinengi-ke izinto ezitjhugulukileko zabeka umuntu ezingeni lokuba abhubhe. Abantu nje bafa ngeenzathu ezahlukahlukeneko. Namhlanje akusenanto engabulaliko, ngitjho nomkhuhlani tle, loya owawelatjhwana ngenghana nekhathazo uphole nya. Inengi labantu libulalana ngebanga lomona. Abanye babulalelana iintombi nanyana amasokana. Ukubhubha ngebanga lokuhlatjwa ngomukhwa, ukudla iindakamizwa ezisesilinganisweni esidluleleko nanyana ngesigidi, sekuvamile namhlanje.

Kungaba kuhle kobana njengesitjhaba khesithome ukuqala unobangela walokhu, sekunokuqala ekwenzekako.

Kokuthoma, thina abaphila namhlanje, sisizukulwana esibuthakathaka ngokomzimba nangokommoya. Imizimbethu ayisakwazi ukujamelana nobujamo bemvelo njengombana kufanele nangendlela kwakusenzeka ngakho ekadeni. Kwaba makhaza ngakusasa iimbhedlela zizala swi. Kwatjhisa khulu iimbhedlela zizala ziphuphume. Umuntu wasela amanzi angakahlanzwa ngamakhemikhali, ungena esibhedlela agijima. Umuntu wadla ukudla okungakavuthwa, ulala angakalali. Koke lokhu kutjengisa bona imizimba esithi ngeyethu le, ayisakufuni ukuphila ngokwemvelo, ifuna ukuphila ngokuhlala ivuselelwa nokugadwa. Ngaphandle kwalokho, nokuqina ngokwamandla akusekho. Umuntu nakafuna ukukhamba ibanga elingangekhilomitha elilodwa, ufuna isithuthi esingamthwala siyombeka lapho. Nakungasinjalo wakhamba ngeenyawo, yindaba ekulu ezokuthoga nodorhodere.

**IMITLOMELO YESIGABA B: 10**

**ISIGABA C: IHLELO NOKUSETJENZISWA KWELIMI****UMBUZO 3**

Phendula umbuzo 3 kanye nombuzo 4

- 3.1 Buyelela utlole imitjho engenzasi bese kuthi esikhundleni samabizo atlolwe ngokunzima khulu usebenzise izabizwana zamambala. Khetha kilezi ezikibokaki.
- (lona, wona, yona, bona)
- 3.1.1 **Utjani** butjhile izolo. (1)
- 3.1.2 **Ikhalenda** yomnyaka lo iphelile. (1)
- 3.2 Buyelela utlole umutjho olandelako uwutjhugulule uveze ukuvuma.
- UVusumuzi akasayithandi inyama ebovu. (2)
- 3.3 Funda umutjho ongenzasi. Jamiselela ibizo elitlolwe ngokunzima khulu ngebizo eliveza ubusikazi. Khetha ipendulwakho kilezo ezinikelweko ezikubokaki.
- (ikukhwana, isikhukhukazi, ikukhukazi)
- Ikukhu** engiyiphiwe ngugogo ibekele amaqanda izolo. (1)
- 3.4 Buyelela utlole umutjho olandelako bese unciphisa amagama atlolwe ngokunzima khulu.
- Ikabi** yakwakhe ilinyazwe **besana** izolo. (2)
- 3.5 Buyelela utlole imitjho elandelako bese utjhugulula amagama atlolwe ngokunzima khulu aveze iinabiso zendawo, abondaweni.
- Isibonelo:** linkomo zihlezi **isibaya**.  
linkomo zihlezi **ngesibayeni**.
- 3.5.1 linkolo nazivalwako ngizokuya **ugogo**. (1)
- 3.5.2 Watjhiya abentwabakhe **amarubhi**. (1)
- 3.6 Buyelela utlole umutjho ongenzasi. Sebenzisa iinkhuliso esikhundleni samagama atlolwe ngokunzima khulu.
- Inyathelo** lakaMuzi libiza **imali** enengi. (2)



- 3.7 Hlanganisa imitjho engenzasi. Khetha isihlanganiso ekungiso kilezi ezikibokaki.  
(godu, ukuthi, lokha, bonyana)  
USipho uyakuthanda ukukhamba adlala. USipho uyathanda ukudlala athunyiweko. (1)
- 3.8 Funda umutjho ongenzasi bese uphendula imibuzo elandelako.  
Uyise utjhayiswe yikoloyi, phela uyawathanda **amabele**.
- 3.8.1 Ingabe igama elitlolwe ngokunzima khulu lisetjenziswe esikhundleni saliphi igama? Tlola igamelo. (1)
- 3.8.2 Kubayini kusetjenziswe igama lamabele esikhundleni salelo olitole ngehla ku-3.8.1. (1)
- 3.9 Buyelela utlole umutjho olandelako kodwana uhlomelele iimvumelwano ezifaneleko.  
**Isibonelo:** Izinja hlezi ngaphandle  
**Ipendulo:** Izinja zihlezi ngaphandle.  
Ulethe imali -khe izolo. Uthe nakafikako -thola angekho. Wamlinda ngaphasi komuthi onamakari -hlaza. (3)
- 3.10 Buyelela utlole imitjho engenzasi bese utjhugulula amagama atlolwe ngokunzima khulu aveze ubunini (ubunikazi.)  
**Isibonelo:** lintonga ubaba zingaphandle.  
**Ipendulo:** lintonga **zakababa** zingaphandle.
- 3.10.1 Indlu **uMasango** iphelile ukwakiwa. (1)
- 3.10.2 Ibisi **ikomo** angilidli mina. (1)
- 3.11 Buyelela ufunde umutjho ongenzasi bese uphendula umbuzo.  
UMLayedwa sekaphenduke **ikomo edla yodwa** soloko abhujelwa nguyise.  
Tlola ihlathululo yamagama atlolwe ngokunzima khulu. Khetha ipendulwakho kilezi onikelwe zona ngenzasi.  
(udla khulu, uthanda ukuhlala yedwa, uyazibona) (1)





3.12 Funda umutjho ongenzasi bese uphendula umbuzo.

UFuduka **utjhuka** irogo lakhe.

Buyelela utlole umutjho ongehla bese utjhugulula umqondo wesenzo esitlolwe ngokunzima khulu siveze **ukwenzisisa**. (2)

3.13 Thatha amagama alandelako wakhe ngawo umutjho ozwakalako.

ekupheleni, UVusumuzi, komuzi. uhlala (2)

3.14 Buyelela utlole imitjho engenzasi kodwana uthome ngamagama athalelweko.

3.14.1 Inja ihlafunya **ithambo**. (2)

3.14.2 UBafunani ubhebhule **umntwana**. (2)

3.15 Khetha iimpendulo zezaga kukholomu **B**.

	<b>IKHOLOMU A</b>	<b>IKHOLOMU B</b>
3.15.1	linkhonkhwani ezimaqalanga aziwubetheli umuzi.	A Kungabhubha ihloko yekhaya, abantwana bazenzela umathanda.
3.15.2	Ithi ingafa ikulu, amaqanda abole.	B Emzini kuyabaswa bekube nentuthu. C Abantu abakhe maqalanga akusilula kobana bahlanganise iindaba zabo. D linkhonkhwana ezingakabazwa kuhle angeze zakwazi ukwakha indlu. E Ikulu nayifileko, kuyonakala.

(2 x 1)

(2)  
**[30]**

**UMBUZO 4**

4.1 Funda ikulumo elandelako bese uphendula imibuzo elamako.

**Sithi kini noke bakwaThubana, duduzekani, okuniveleleko nabanye kuyabavelela. Akutjho bona uZimu unikhohliwe ngalokhu. Nizifanise nabanye abantu.**

Hlathulula bona kusuke kwenzenjani nakukhulunywa amagama la asethekstini engehla. Ipendulwakho ayibe mumutjho. (2)

4.2 Funda isikhangiso esingenzasi bese uphendula imibuzo elandelako.

INGABE UNAZO IIMFUNDO ZOKUBA NGUMABHALANA?  
YEWIZE UZOKUSEBENZA KWA-ESKOM  
UFUNEKA MSINYANA  
THUMELA I-C.V YAKHO KINASI INOMBORO YEFEKSI 011234 2323.

Kumele ube nalokhu:

1. amaphepha wokutjhayela.
2. ukwazi ukukhuluma isiNgisi nesiNdebele.

**IMIBUZO**

4.2.1 Kubayini amagama wokuthoma emdeni 1 no-2 esikhangisweni esingehla atlolwe ngamaledere amakhulu. (2)

4.2.2 Kubayini ibizo i-Eskom litlolwe ngokuhlukileko? (1)

4.2.3 Kubayini lokho omele ube nakho kutlolwe ngamagama amancani? (2)

4.3 Funda itheksti elandelako bese uphendula umbuzo ongenzasi.

**Kuthiwa abafazi abakafaneli beze kilowo mngcwabo. Kufanele kuze amadoda kwaphela.**

Kunokubandlulula ethekstini engehla. Vuma/phika bese usekela ipendulwakho. (2)

4.4 Funda umutjho ongenzasi bese uphendula umbuzo olandelako.

**Boke abafazi bamakhuwa bamavila, bajayele ukwenzelwa izinto.**

Ingabe umutjho ongehla lo uliqiniso nanyana mbono nje kwaphela? Ipendulwakho ayibe mumutjho osekewelweko. (3)



4.5 Funda itheksti engenzasi bese uphendula imibuzo elandelako.


Ingabe sifuna amavila na? Ingabe sifuna abakhohlisi na?

Ingabe siifuna abantu abangeze basikhohlwa bona siyaphila?  
Vowudelani thina!

4.5.1 Mihlobo bani yemibuzo ebuzwe ngehla? Ipendulwakho ayibe mumutjho OWODWA. (2)

4.5.2 Yini umsebenzi wemibuzo engehla ku-4.5? Ipendulwakho ayibe mumutjho OWODWA. (2)

4.6 Qalisisa isithombe esingenzasi bese uphendula imibuzo elandelako.



4.6.1 Ingabe abantu abasesithombeni esingehla bakuyiphi indawo? Sekela ipendulwakho ngephuzu ELILODWA. (3)

4.6.2 Ingabe isithombesi siveza isikhathi sanje nanyana sakade? Sekela ipendulwakho ngephuzu. (2)

4.6.3 Kukhona ababili kilesisithombe abenza okuhlukileko, ingabe benzani? (1)

4.6.4 Ucabanga bona lokhu abakwenzako laba ababili kufanele ukwenziwa na? Sekela ipendulwakho ngamaphuzu AMABILI. (2)

4.6.5 Ngubani umuntu lo ojame ngaphambili ovule nezandla. (1)

4.7 Buyelela utlole isiqetjhana esingenzasi kodwana ulungise amagama atlolwe ngokunzima khulu.

**Umhatjho** obizwa ngokuthi yiKwekwezi FM uthandwa babantu boke. **Ukhari** uti uyawulalela **nakangada umshanyelo** wakhe. **Ababhubhelweko** basebenzisa iKwekwezi ukwazisa iinini zabo.

(5)  
[30]

**ISIGABA D: ZEMITLOLO**

Phendula imibuzo EMIBILI ngaphasi kombuzo 5 nanyana umbuzo 6.

**UMBUZO 5****Uzangenzani?: Jiyane DM Kanye Nabanye**

Khetha imibuzo EMIBILI ngaphasi kombuzo lo uyiphendule.

5.1 Funda isiqetjhana esingenzasi bese uphendula imibuzo.

'Siyavuma!"  
 "Amakhosi ayakhuluma na vumani!"  
 "Siyavuma!"  
 "Abaleleko bayalila na vumani!"  
 "Siyavuma!"  
 "Bathi akuhlatjwe imbuzi enzima na vumani!"  
 "Siyavu..."

- 5.1.1 Ingabe imbuzi enzima iyathethelela? Vuma/Phikisa bese uyasekela. (3)
- 5.1.2 Ngubani lo ogulako begodu uthome lokha nakabuyaphi? (2)
- 5.1.3 UNel, uNomarhalasana, wathi umntwana uphethwe yini.? Hlathulula ngomutjho OWODWA. (2)
- 5.1.4 Umbhorofidi yena wathi umntwana uphethwe yini? (2)
- 5.1.5 Unina lalo ogulako uyise umbiza athini? (1)
- [10]**

**NANYANA**

5.2 Funda isiqetjhana esingenzasi bese uphendula imibuzo.

Wathokoza waphakamisa ikapho wathi mfa mfa mfa, wandzindzisa wabe wesula umlomo. Wathi, 'Akutjho-ke makhelani Mkhwebani,' atjho endodeni ehlezi ngeqadi ngakwesokudla. "Uthi akasekho umfazi ofuna ukuba libuya lakaMlayedwa? Namhlanje ngifuna ukukutjela khona uzangazi kuhle bona ngimumuntu onjani. Mina ngiyindoda yambala. Angisiyo indoda ezwa ngomfazi bonyana yenzi."

- 5.2.1 Ngubani owenza abafazi amabuya endatjaneni engehla? (1)
- 5.2.2 Laba abakhulumako esiqetjhaneni esingehla bakuphi begodu bazokwenzani lapho? (2)
- 5.2.3 Tlola isihloko sendatjana engehla. Ingabe siyanemba? Hlathulula. (2)



- 5.2.4 Ukuya ngokwendatjana yini amabuya? Hlathulula ngomutjho (2)
- 5.2.5 Indatjana engehla iyafundisa? Vuma/Phikisa bese uyasekela. (3)  
**[10]**

**NANYANA**

5.3 Funda isiqetjhana esingenzasi bese uphendula imibuzo.

Awu madoda ningabe nibulale iqhegu elinjengami nithi nenzani. Kusasambe ipama phezu kwakhe, ezwe izandla zingena ngeenkhwanyeni. Ezwe omunye athi, 'Libhutjhe leliqhegu linyenyuku.' Athi angezwa igama lokubhutjha akhumbule bonyana kukufa lokho ngelimi labo.

- 5.3.1 Ngiliphi iqhegu elibulawako begodu libulawa bobani? (2)
- 5.3.2 Ukuya ngokwendatjana, kutjho ukuthini ukuthi 'Libhutjhe leliqhegu linyenyuku'? (2)
- 5.3.3 Obulawako lo ingabe ukuyiphi indawo begodu uzokwenzani lapho? (2)
- 5.3.4 Tlola isihloko sendatjana engehla. (2)
- 5.3.5 Ngisiphi isifundo esitholakala endatjaneni engehla? (2)  
**[10]**

**NANYANA**

5.4 Funda isiqetjhana esingenzasi bese uphendula imibuzo.

'Ayi! Nomzana namhlanje ngifuna ukukutjela iqiniso. Hlala phasi –ke.' Ahlale phasi umNqophisi.

"Uyabona abantu bayatshwenya. Mhlapha nje ngikhutjuliwe ngaba sisandla sakho, babenemilonyana. Manje ihloko-kantoro nayizimisele ukutjhugulula umthetho ngalendlela kuzokuba njani? Akunamuntu ofuze ukukhutjhulelwa imali."

- 5.4.1 Tlola isibongo somNqophisi weKampani. (1)
- 5.4.2 Ngubani isekela lomNqophisi? (1)
- 5.4.3 Tlola iinghonyayo EZIMBILI iinsebenzi ebezilila ngazo. (2)
- 5.4.4 UJali uvezwe njengomlingisi onjani? Veza amaphuzu AMABILI asekelweko. (4)
- 5.4.5 Bekungubani isekela lomNqophisi ngaphambilini begodu lasitjhiyelani isikhundleso? (2)  
**[10]**

**NANYANA**

## 5.5 Funda isiqetjhana esingenzasi bese uphendula imibuzo.

'Maye mina! Ngizofese ngithini kuyise. Nanjalo bekangafuni kangangani bona ngize. Maye ngethorwanakhe! Maye! Ikani, wangenza nawe mma.'

'Thula mntwanami. Maye! Bengi... bengithi ngiyakuqinisa nami be... ngingazi bona kuzafese kuvele okunje.' Balile baratharathe laba ababili.

- |                  |   |                    |
|------------------|---|--------------------|
| 5.5.1            | USponono mntwana wakabani?  | (1)                |
| 5.5.2            | Unina lakaSponono unabantwana abangaki? Dzubhula endatjaneni igama elisekela ipenduwakho. | (2)                |
| 5.5.3            | Tlola isihloko sendatjana engehla.  | (1)                |
| 5.5.4            | Laba ababalwe esiqetjhaneni esingehla bayokwenzani esibhedlela. Hlathulula ngomutjho.     | (2)                |
| 5.5.5            | Ugogo lakaSponono uvezwe njengomlingisi onjani? Veza amaphuzu AMABILI asekelweko.         | (4)<br><b>[10]</b> |
| <b>(10 + 10)</b> |   | <b>[20]</b>        |

**UMBUZO 6****Ayikhulunyelwa Eziko: Jiyane DM, Mahlangu RN**

Khetha imibuzo EMIBILI ngaphasi kombuzo lo.

6.1 Funda isiqetjhana esingenzasi bese uphendula imibuzo.

Nangambala yathi ingazibophela yanqopha emasimini, yalima, yatjala. Yathi ebasaneni, 'Khambani neenkomezi ekhaya.' Yona yalala ngemseleni yaphakamisa isandla. Yathi isalele njalo ingakatjheji, yezwa ngento ithi tlho phezu kwesandla. Inyoni yadlumbana bona sigodo. Yathoma yavuma yathi:

'Magade wovumbu! Vumbu!  
Magade wocime! Cime!  
Magade wovumbu! Vumbu!'

- 6.1.1 Indoda yalala ngaphakathi kwani begodu beyilalelani ngapho? (2)
- 6.1.2 Ngemva kwengonyana engehla bekwenzekani? (2)
- 6.1.3 Inyoni yabe ikghuthula ibisi nakwenzenjani? (1)
- 6.1.4 Tlola izenzo ezintathu ezingakholekile ezitholakala enganekwaneni engehla. (3)
- 6.1.5 Tlola uveze bona indoda ivezwe njengomlingisi onjani? Tlola iphuzu ELILODWA elisekelweko. (2)

**[10]****NANYANA**

6.2 Funda isiqetjhana esingenzasi bese uphendula imibuzo.

Kwathi lapho seliphakathi nomlambo ibhubezi, umqasa wathi, 'Udlumbana uhlakaniphile bhubezi ndina! Kade khulu usitlhagisa. Namhlanjani kuphelile ngawe, sikuphekelela kiboyihlomkhulu.' Watjho njalo umqasa, indlovu yayilisa intambo. Ibhubezi lathi tjhinge ngemanzini.

- 6.2.1 Ibhubezi beliyaphi nalizakukghanywa mamanzi nje begodu kunani? (2)
- 6.2.2 Tlola amabizo wabalingisi ababili abatholakala enganekwaneni engehla. (2)
- 6.2.3 Ngiliphi iqhinga eliveza ukuhlakanipha, elasetjenziswa ukubulala ibhubhezi? (2)
- 6.2.4 Tlola izenzo EZINTATHU ezingakholekile ezitholakala enganekwaneni engehla. (3)
- 6.2.5 Tlola isihloko senganekwana engehla. (1)

**[10]****NANYANA**

## 6.3 Funda isiqetjhana esingenzasi bese uphendula imibuzo.

Itsikizi yahlabeka. Yayidlumbana bona umuntu uzoyimela begodu ayirhawukele. Yasuka lapho yathi emuntwini, 'Unetshele muntu ndina! Ubhalelwa kusilamula kuhle khona ngizokufumana ukudla. Ugida ngethambo lami. Utjheje ungaqaphazelwa ziingazi. Begodu ukhumbule bonyana isikhuni sibuya nomkhwezeli. Kusukela namhlanje ngimi nawe esitikini, nalo ulibambe lingatjhingi.'

- 6.3.1 Kungani kuthiwa umuntu unetshele? Hlathulula ngomutjho. (2)
- 6.3.2 Ukuya ngokwesiqetjhana esingehla, kukwenzani ukugida ngethambo lomunye? (2)
- 6.3.3 Tlola isihloko senganekwana engehla. (1)
- 6.3.4 Itsikizi ivezwe njengomlingisi onjani? Tlola iphuzu ELILODWA elisekelweko. (2)
- 6.3.5 Tlola izenzo EZINTATHU ezingakholekile ezitholakala enganekwaneni engehla. (3)
- [10]**

**NANYANA**

## 6.4 Funda isiqetjhana esingenzasi bese uphendula imibuzo.

Wanapela, wakhwela emthini wayokufika esithorini somuthi. Wazibona sele afike kinye ikari. Wafumana indodanakhe, umjekakhe nendoda eyeba umjeka. Umfazi wathaba khulu nakabona umntanakhe nomjeka. Wathoma wabangisa indoda bonyana kubayini yebe umjekayo. Indoda yamtjela bona ngiyo eyathenga ikomo yakhe ngeembontjisi ezine. Yakhupha imali yamnikela. Yathatha iimbontjisi zayo ezaziseemthini, kwayiwa ngamakoro ngamakoro. Umfazi wajabula khulu ngombana athole umntanakhe nemali.

Cosu cosu iyaphela.

- 6.4.1 Tlola isihloko senganekwana engehla. (1)
- 6.4.2 Tlola izenzo EZIMBILI ezingakholekile ezitholakala esiqetjhaneni esingehla. (2)
- 6.4.3 Yini umsebenzi weenganekwana? Veza amaphuzu AMATHATHU. (3)
- 6.4.4 Ukuya ngokwenganekwana engehla kukwenzani ukuya **ngamakoro ngamakoro**. (2)
- 6.4.5 Umfazi enganekwaneni engehla uvezwe njengomlingisi onjani? Tlola iphuzu ELILODWA elisekelweko. (2)
- [10]**

**NANYANA**



## 6.5 Funda isiqetjhana esingenzasi bese uphendula imibuzo.

Ngakusasa uDimana wathi kuDimakazana, 'Mntanhu ngisakhamba godu. Ngiyokufuna kokugoma, ungavuleli umuntu ngiyakuncenga.'

Wakhamba kanti ipisi ibabonile. Yakhamba yaya elitjeni yafika yathi ngelizwi elirhorozako:

'Litje likantunjambili  
Ngivulela ngingene  
Azange ngabon' ilitje  
Litje leentunjeembili.'

UDimakazana wathi, 'Akusuye wekhaya wezandla ezibovana ngaphandle nangaphakathi.'

- 6.5.1 UDimakazana unaliphi itshwayo ukuya ngesiqetjhana esingehla? (2)
- 6.5.2 UDimakazana wezwa ngani bonyana akusuye wakwabo? (2)
- 6.5.3 Tlola izenzo EZIMBILI ezingakholekile ezitholakala esiqetjhaneni esingehla. (2)
- 6.5.4 Tlola isihloko senganekwana engehla. (1)
- 6.5.5 UDimakazana akalaleli. Vuma/Phikisa bese usekele unqophise enganekwaneni. (3)
- [10]**

**IMITLOMELO YESIGABA D: 20**

**INANI LOKE: 120**

